



Broj: T18 0 KT 0017509 24
Brčko, 10.02.2025. godine

Na osnovu člana 35 stav (2) tačka z) i člana 226 stav (1) Zakona o krivičnom postupku Brčko distrikta BiH, p o d i ž e m:

OPTUŽNICU

Protiv:

1. P. P.,
2. S. Dž.,
3. N. Š.,
4. E. I.,

Što su:

1) Dana 07.02.2024. godine, oko 23,30 č, u Brčkom, u naselju ..., u kome su nastanjeni pretežno ..., kao policijski službenici Jedinice opšte policije, Policije Brčko distrikta BiH, postupajući po nalogu nadređenog vezano za prijavu o objavljivanju snimka A. Dž. na društvenoj mreži u kome vrijeđa policijske službenike i prijeti im, dok vozi motorno vozilo gradskim ulicama tokom istog dana, došli do kuće S. Dž., A. brata, a zatim, zajedno, i u dogovoru, svjesni da nemaju ovlašćenje da uđu u Dž. kuću, s namjerom upotrijebili fizičku snagu djelovanjem na ulazna vrata koja su bila zaključana, a sve kako bi ušli unutra i pronašli A., što su i učinili, pa nakon što je S. ustao i krenuo ka vratima jer je čuo buku, jedan od njih je S. zadao udarac otvorenom šakom u predjelu lica i zatvorili su ga u kuhinju gdje je boravio sa M. Š., dok su nastavili da povišenim tonom govore „Gdje je A.“, i ušli su u spavaću sobu lijevo u kojoj je spavao A. zajedno sa svojim ocem B. Dž. i djetetom A. Š., pa nakon što su u mračnoj sobi pronašli A., zadali su mu više udaraca nogama i palicama po glavi i tijelu, izveli su ga iz sobe u hodnik i tu ga ponovo udarali, dok je A. bolno jaukao, a potom su ga lišili slobode, stavili mu na ruke sredstva za vezivanje, i izveli ga iz kuće, psujući i vrijeđajući A., S. i B., iako su bili svjesni da ništa od navedenih radnji nije bilo neophodno i u isključivoj mjeri potrebno radi izvršenja službene radnje, upotrebljavajući tom prilikom fizičku snagu i palice, što je sve u suprotnosti sa članovima 3, 6 i 8 Pravilnika o upotrebi sile („Službeni glasnik Bd BiH 13/08), te svjesni da ih Adis nije napao i vrijeđao, niti je narušavao javni red i mir, da su ga zatekli na spavanju kao i druge ukućane i da time ugrožavaju mir, dostojanstvo i integritet A. i ukućana, što su i htjeli, usljed čega su ugrozili i povrijedili tjelesni integritet i ljudsko dostojanstvo A. Dž. i njegovih ukućana, koji su tom prilikom bili poniženi i uplašeni za svoju i A. bezbjednost, i kojom prilikom je A. pretrpio tjelesne i duševne patnje, da bi potom, nakon što su A. Dž. izveli iz kuće lišenog slobode, vezanog sredstvima za vezivanje ruku na leđima, bez mogućnosti pružanja otpora, koji otpor nije ni pružao, dok su ga P. P. i N. Š. sprovodili do službenog vozila, za njima se kretao

E. I., pa je u dva navrata nogom zadao udarac u zadnji dio tijela A. Dž., pri čemu P., Dž. i Š. nisu preduzeli ništa da spriječe navedene radnje,

dakle, kao službena lica u obavljanju službe neovlašćeno prodrli u tuđi dom i drugog zlostavljali,

2) Nakon što su dana 07.02.2024. godine oko 23,30 č u Brčkom, u naselju ..., neovlašćeno prodrli u kuću S. Dž. i preduzeli radnje zlostavljanja u službi prema A. Dž. i njegovim ukućanima, kao policijski službenici Jedinice opšte policije, Policije Brčko distrikta BiH, svjesni da su postupali suprotno zakonskim ovlašćenjima, i da njihovo postupanje za posljedicu ima disciplinsku i krivičnu odgovornost, zajedno i u dogovoru, sačinili službenu dokumentaciju o navodnom postupanju prema A. Dž. i to, Izvještaj o upotrebi sile, broj 14.01-04.1-10670/24 od 07.02.2024. godine, Službenu zabilješku broj 14.01-04.1-10664/24 od 08.02.2024. godine, koju su potpisali sva četvorica, dok je E. I. sačinio Službenu zabilješku o počinjenom prekršaju broj 14.01.-04.1-10672/24 od 08.02.2024. godine, Zapisnik o lišenju slobode broj 14.01-04.1-10666/24 od 07.02.2024. godine, Zapisnik o lišenju slobode po prekršaju broj 14.01-04.1-10667/24 od 07.02.2024. godine, iako su znali i bili svjesni da sadržina ove dokumentacije ne odgovara istini, i da dana 07.02.2024. godine oko 23,30 č u Brčkom, u naselju ... A. Dž. nije narušio javni red i mir, i da ih nije dočekao na vratima i uputio psovke, nakon čega mu je navodno bilo naređeno da prestane sa narušavanjem javnog reda i mira, i da nije krenuo prema policijskim službenicima u namjeri da se udalji sa lica mjesta, pri čemu se nije sapleo o drvene cjepanice i pao, kojom prilikom je navodno pružao aktivni otpor, zbog čega je bio lišen slobode i doveden u prostorije Policije Brčko distrikta BiH, pa su nakon sačinjavanja dokumentacije sa ovakvom sadržinom, upotrijebili je pred nadležnim organima Policije Brčko distrikta BiH, svjesni njene neistinitosti, što su i htjeli, čime su inicirali pokretanje prekršajnog postupka protiv A. Dž., i izbjegli disciplinsku odgovornost za protivpravno postupanje,

dakle, kao službena lica unijeli neistinite podatke u službenu ispravu, te je upotrijebili u službi kao da je istinita,

čime su kao saizvršioци pod tačkom (1) učinili krivično djelo - Narušavanje nepovredivosti doma - iz člana 181 stav (2) i krivično djelo - Zlostavljanje u obavljanju službe - iz člana 179, a pod tačkom (2) učinili krivično djelo - Falsifikovanje službene isprave - iz člana 383 stav (2) Krivičnog zakona Brčko distrikta BiH, sve u vezi sa članom 31 i 54 Krivičnog zakona Brčko distrikta BiH.

Ovom objavom ne preudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.
